

ଥେସଲନିକୀୟମାନଙ୍କ ନିକଟକୁ ପାଉଲଙ୍କ ପ୍ରଥମ ପତ୍ର ଥେସଲନିକୀ ବିଶ୍ୱାସୀକତାଃତେ ପ୍ରେରିତ୍ ପାଉଲୁସ୍‌ଆଃ ପାହିଲା ଚିଟାଉ ପାରିଚାଏ

ପ୍ରେରିତ୍ ପାଉଲୁସ୍ ଥେସଲନିକୀ କାଲିସିୟାତେ ନେ ଚିଟାଉ ଅଲ୍ୟାକାଦାଏ ୧:୧ । ନେ ଚିଟାଉ ଥେସଲନିକୀ କାଲିସିୟା ନାଙ୍ଗ୍ ପାଉଲୁସ୍‌ଆଃ ପାହିଲା ଚିଟାଉ ତାନାଃ । ନେଆଁ ଯୀଶୁ ଖ୍ରୀଷ୍ଟ୍‌ଆଃ ଜାନାମ୍ ତାୟମ୍ ୫୧ କରେ ଅଲ୍ୟାକାନା । ପାଉଲୁସ୍ ଚିମ୍ତା କରିନ୍ତି କାଲିସିୟାରେ ତାଇକେନାଏ, ଇମ୍ତା ନେ ଚିଟାଉ ଅଲ୍ୟାକାଦ୍ ତାଇକେନାଏ । ନେ ଚିଟାଉ ଅକନ୍ କାଲିସିୟାକେ ଅଲ୍ୟାକାଦ୍ ତାଇକେନାଏ, ଏନା ଇନିଃ ବାର୍‌ସାତେ ମିସ୍‌ନାରି କାମି ହରାସେନ୍‌କେନ୍ ଇମ୍ତା ନେ କାଲିସିୟାକେ ବାଇୟାକାଦ୍ ତାଇକେନା ପ୍ରେରିତ୍ ୧୭:୧-୧୦ । ଏନା ଚିମିନ୍ ଯିହୁଦୀକ ଆଡ଼ଃ ଚିମିନ୍ ସାଅଁସାର୍ ହଡ଼କଆଃ ହରାତେ ହାରାଇଦିକାନା ମେନ୍ତେ ପ୍ରେରିତ୍ ପୁଥ୍ରେ କାଜିକାନା ।

ପାଉଲୁସ୍ କାଲିସିୟା ବାଇକେଦ୍ ତାୟମ୍‌ତେ ଥ୍ମା ମାହାଁ ଥେସଲନିକୀରେ କାଏ ତାଇନ୍ ଦାଡ଼ିୟାନା । ଏନାତେ ଚୁଣ୍ଡୁରେ ଏନ୍ତାଃରେ ମେନାକ ବିଶ୍ୱାସୀକକେ ଜୀଉରେ କେଟେଦ୍ ଏମାକ ନାଗେନ୍ତେ ନେ ଚିଟାଉ ଅଲ୍‌କୁଲ୍‌କେଦାଏ । ମିଆଁଦ୍ ଖ୍ରୀଷ୍ଟିୟାନ୍‌କେ ଚିଲ୍‌କା ଜୀହିଦ୍ ଲାଗାତିୟାଁ, ନେ ଚିଟାଉରେ ପୁରାଃ ବିଷାଏ ଆଡ଼ଃ ଏଟାଃ ଏଟାଃ ଚିମିନ୍ ଆନ୍‌ଚୁକ ମେନାଃ ।

ପାଉଲୁସ୍‌ଆଃ ଆଡ଼ଃମିସା ହିନିଜୁଃ ବିଷାଏରେ ଅଲ୍ୟାକାନା । ହରାସାକାଅଆଃ ଥେସଲନିକୀ କାଲିସିୟାରେନ୍ ବିଶ୍ୱାସୀକ ପୁରାଃତେ ନେ ବିଷାଏରେ ଚିହ୍ନୁଲ୍‌କେଦ୍‌ତେ ତାଇକେନାକ । ପାଉଲୁସ୍ ଯୀଶୁଆଃ ଆଡ଼ଃମିସା ହିନିଜୁଃକେ ନେଲ୍‌କେଦ୍‌ତେ ପାର୍‌ମେଶ୍ୱାର୍‌କେ ସୁକୁଇଚି ଲେକା ଜୀଦାନ୍ ବିତାଅ ନାଗେନ୍ତେ ଉଦୁବାଃଏ ୫:୬-୮ ।

ପୁଅ ଭିତରରେ ତାଇକାନ କାଜି

୧. ପାଉଲୁସ୍ କାଲିସିୟାକେ ଜହାର୍ ଆତଃ ପାର୍ମେଶ୍ୱାର୍‌କେ ଧାନ୍ୟାବାଦ୍ ଏମ୍‌କେଦ୍‌ତେ ନେ ଚିଟାଉରାଃ ଏନେଟେଦ୍ ହବାକାନା । ୧
୨. ତାୟମ୍‌ତେ ଇନିଃ ତୀମଥ୍ ଆଉଞ୍ଜାକାଦ୍ କାଜି ଆତଃ ଆୟାଃ କାମି ବିଷାଏରେ କାଜିକାଦା । ୨-୩
୩. ପାଉଲୁସ୍ ଆରୁକାଦାଏ ଯେ, ଖ୍ରୀଷ୍ଟିୟାନକ ଚିଲକା ଯୀଶୁ ଖ୍ରୀଷ୍ଟିଆଃ ଆତଃମିସା ହିନିଜୁଃରେୟାଃ ମାର୍ସାଲ୍‌ରେକ ତାଇନା । ୪:୧-୫:୧୫
୪. ପାଉଲୁସ୍ ଆତଃମିସା କାଲିସିୟାକେ ଜହାର୍ ଆତଃ ଇନ୍‌କୁକେ ନେ ଚିଟାଉକେ ପାଢ଼ାଅ ଲାଗାତିଙ୍ଗ୍‌ୟାଃ ମେନ୍ତେ କାଜିଚୁଣ୍ଡୁକେଦା । ୫:୧୭-୨୮

୧ *ଆରୁଆଃ ଆପୁ ପାର୍ମେଶ୍ୱାର୍ ଆତଃ ପ୍ରାଭୁ ଯୀଶୁ ଖ୍ରୀଷ୍ଟ୍ରେ ତାଇକାନ ଥେସ୍‌ଲନିକା କାଲିସିୟାରେନ୍ ହଡ଼କତାଃତେ ପାଉଲୁସ୍, ସିଲ୍ଲାସ୍ ଆତଃ ତୀମଥ୍‌ଆଃ ଚିଟାଉ ।
 ସାୟାଦ୍ ଆତଃ ଜୀଉସୁକୁ ଆପେରେ ହବାଅଃକା ।

ଥେସ୍‌ଲନିକାରେନ୍‌କଆଃ ଜୀଦାନ୍ ଆତଃ ବିଶ୍ୱାସ୍

୨ ଆଲେ ସବେନ୍ ଇମ୍‌ତା ଆଲେୟାଃ ବିକ୍ତିରେ ଆପେକେ ପାହାମ୍‌ପେତାନଲଃ ପାର୍ମେଶ୍ୱାର୍‌କେଲେ ଜହାରିତାନା । ୩ ଚିୟାଃତି ଆଲେ ଆରୁଆଃ ଆପୁ ପାର୍ମେଶ୍ୱାର୍‌ଆଃ ସାମ୍‌ନାଙ୍ଗ୍‌ରେ ଆପେୟାଃ ବିଶ୍ୱାସ୍‌ରାଃ କାମି ଆତଃ ଆପେୟାଃ ଦୁଲ୍ଲାଡ଼୍‌ତେ ଅତଙ୍ଗ୍‌ଅଃତାନ୍ କେଟେଦ୍‌କାମି, ଆତଃ ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟ୍ରେ ଆସ୍ରାଏତାନ୍ ଆପେୟାଃ ସାହାତିଙ୍ଗ୍ ଜୀଦାନ୍‌କେଲେ ପାହାମାକାଦା । ୪ ହେ ହାଗା ମିଶିକ, ଆଲେ ସାରିତାନାଲେ, ପାର୍ମେଶ୍ୱାର୍ ଆପେକେ ଦୁଲ୍ଲାଡ଼୍‌ପେତାନା ଆତଃ ଆୟାଃ ହଡ଼ ହବାଅଃ ନାଗେନ୍ତେ ଆପେକେ ସାଲ୍ଲାକାଦ୍‌ପେୟା । ୫ ଚିୟାଃତି ବାଚାନ୍‌ତେ ଏସ୍‌କାର୍ କା ମେନ୍‌ଦ୍ ପାବିତାର୍ ଆମ୍‌ରାଃ ପେଡ଼େଃତେ, ସୁକୁକାଜିରେୟାଃ ସାନାର୍‌ତି ପୁରା ସେକାଡ଼୍‌କେଦ୍‌ତେ ଆପେତାଃତେ ସେଟେର୍‌ୟାନା । ଆଲେ ଆପେଲଃ ତାଇନ୍ ଇମ୍‌ତା ଆପେୟାଃ ବୁଗିନ୍ ନାଗେନ୍ତେ ଚିଲକା ଜୀଦାନ୍ ବିତାଅ ତାଇକେନାଲେ ଏନା ଆପେ ସାରିତାନାପେ

☆ ୧:୧ ୧:୧ ପ୍ରେରିକ୍ ୧୭:୧.

। ^୭ ✠ଆତ୍ମ ଆପେ ଆଲେକେ ଆତ୍ମ ପ୍ରାଭୁକେ ଅତଙ୍ଗକାଇ ତାଇକେନାପେ, ଆତ୍ମ ଆପେ ପୁରାଃ ଦୁକୁ ସାହାତିଙ୍ଗତାନରେୟ ପାବିତାର୍ ଆମ୍ବାଏତେ ହିନ୍ଦୁଃତାନ ସୁକୁରାସକାଲଃ ଏନ୍ ସୁକୁକାଜିକେ ସୁକୁରାସକାଲଃ ତେଲକାଦ୍ ତାଇକେନାପେ । ^୮ ନେ ଲେକାତେ ଆପେ ମାକିଦନିଆ ଆତ୍ମ ଆଖାୟାରେ ତାଇନ୍ତାନ ସବେନ୍ ବିଶ୍ୱାସୀକଆଃ ନାଙ୍ଗ୍ ନାମୁନା ଲେକାପେ ହବାକାନ୍ ତାଇକେନା । ^୯ ଆପେତାଃଏତେ ଏସକାର୍ ପ୍ରାଭୁଆଃ ସୁକୁକାଜି ମାକିଦନିଆ ଆତ୍ମ ଆଖାୟାରେ ଉଦୁବକାନା ଏନା କାହାଗି, ମେନ୍ଦ୍ ଆପେ ପାର୍ମେଶ୍ୱାର୍ତାଃରେ ବିଶ୍ୱାସକାଦ୍ କାଜି ସବେନ୍ତାଃରେ ଉଦୁବକାନା, ଏନାତେ ନେ ବିଷାଏରେ ଆଲେକେ ଆତ୍ମ ଆଦକା ଜେଡ୍ନାଃ କାଜି କା ଲାଗାତିୟା । ^{୧୦} ଆଲେ ଆପେତାଃତେ ସେନ୍ ଇମ୍ତା ଚିଲକା ଆପେ ଆଲେକେ ଦାରମ୍ବକେଦ୍ଲେୟାପେ, ଆତ୍ମ ମୁରୁଡ୍ ସେଞ୍ଜାକେ ବାଗିକେଦ୍ତେ ଆପେ ସାର୍ତି ଆତ୍ମ ଜାନିଦ୍ ପାର୍ମେଶ୍ୱାର୍ତକେ ସୁସାରି ନାଗେନ୍ତେ ମନ୍ଦେପେ ରୁହାଡ୍ତକେଦା, ^{୧୧} ଆତ୍ମ ଚିଲକା ପାର୍ମେଶ୍ୱାର୍ତଆଃ ଖ୍ୱଏଏତେ ଆବୁକେ ବାସ୍ତାଅ ନାଙ୍ଗ୍, ଗଜାକାନ୍କଏତେ ଜୀଉବିରିଦାକାନ୍ ଆୟାଃ ହନ୍ ଯୀଶୁଆଃ ସିର୍ମାଏତେ ହିନ୍ଦୁଃରୁହାଡ୍ତକେ ନେଲ୍ହରା ନାଗେନ୍ତେ ପାର୍ମେଶ୍ୱାର୍ତାଃତେପେ ରୁହାଡ୍ତୟାନା, ଏନ୍ ସବେନ୍ ବିଷାଏରେ ଏନ୍ତାଃରେନ୍ ହଡକ ଜାଗାର୍ ତାନା ।

୨

ଥେସଲନିକାରେ ପାଉଲୁସ୍ଆଃ କାମି

^୧ ହେ ହାଗା ମିଶିକ, ଆଲେ ଆପେତାଃତେ ହିନ୍ଦୁଃତେୟାଃ କା ସାମାକାନା, ଏନା ଆପେୟପେ ସାରିତାନା । ^୨ ✠ଆଲେ ଥେସଲନିକାରେ ଆପେତାଃତେ ହିନ୍ଦୁଃ ସିଦାରେଗି ଫିଲିପି ନାଗାର୍ରେ ଚିଲକା ଆଲେ ଚେତାନରେ ଦୁକୁ ଆତ୍ମ ସାସାତି ହିନ୍ଦୁଃକାନ୍ ତାଇକେନା, ଏନାପେ ସାରିକାଦା । ପୁରାଃ କାଜିକଟଙ୍ଗ୍ ହବାୟାନ୍ରେୟ ପାର୍ମେଶ୍ୱାର୍ତାଃଏତେ ନାମାକାଦ୍ ସୁକୁକାଜି ଆପେକେ ଉଦୁବ୍ ନାଗେନ୍ତେ ପାର୍ମେଶ୍ୱାର୍ ଆଲେକେ ପେଡେଃ

✠ ୧:୭ ୧:୭ ପ୍ରେରିଡ୍ ୧୭:୫-୯. ✠ ୨:୨ ୨:୨ ପ୍ରେରିଡ୍ ୧୭:୧୯-୨୪; ପ୍ରେରିଡ୍ ୧୭:୧-୯.

ଏମାକାଦ୍‌ଲେ ତାଇକେନାଏଁ । ୩ ଆଲେ ଜେତାନ୍ ଭୁଲ୍ ଚାଏ କା ଫାଋତି ଲେକାନ୍ ଉକେଶ୍‌ରେ ଆପେକେ କାଲେ ବିକ୍ତିକାଦ୍‌ପେ ତାଇକେନା, ଚାଏ ଆପେକେ ବେଦାପେ ନାଗେନ୍ତେ କାଲେ ସାନାଙ୍ଗ୍ ତାଇକେନା । ୪ ମେନ୍‌ଦ୍ ଆଲେ ପାର୍‌ମେଶ୍‌ୱାର୍‌ଆଃ ସାନାଙ୍ଗ୍‌ଲେକା ସବେନ୍ ଇମ୍‌ତା କାଜିୟାଃଲେ, ଚିୟାଃତି ଇନିଃ ସୁକୁକାଜି ଉଦୁବ୍‌ରେୟାଃ ବାହାରମ୍ ଆଲେକେ ଏମାକାଦ୍‌ଲେୟା । ହଡ଼କକେ ସୁକୁଇତିକ ନାଗେନ୍ତେଦ କା ମେନ୍‌ଦ୍ ଅକନ୍ ପାର୍‌ମେଶ୍‌ୱାର୍ ଆରୁଆଃ ମନ୍‌ସୁରୁଦ୍ ବିଡ଼ାଅକେଦ୍‌ତେ ଆଟ୍‌କାର୍‌ଉରୁମାଃଏ, ଇନିଃକେ ସୁକୁଇତି ନାଗେନ୍ତେଲେ ସାନାଙ୍ଗ୍‌ତାନା । ୫ ଆପେ ବୁଗିଲେକାପେ ସାରିତାନା, ଆଲେ ଆପେତାଃତେ ଚିଉଲାହ ହସଡ଼ କାଜିକ କାଜିକେଦ୍‌ତେ କାଲେ ହିନ୍ତୁଃକାନ୍ ତାଇକେନା, ଚାଏ ଆଲେ ଖୁଜ୍ ରାଃ ହାୟାତେ ବେଦା କାଜି କାଲେ କାଜିକାଦ୍ ତାଇକେନା, ଏନାରାଃ ଗାଞ୍ଜା ପାର୍‌ମେଶ୍‌ୱାର୍ ତାନିଃ । ୬ ଆଲେ ଜେତାଏତାଃଏତେ ମାଇନ୍ ନାମେ ନାଗେନ୍ତେ କାଲେ ସାନାଙ୍ଗ୍‌କାଦ୍ ତାଇକେନା, ଆପେତାଃଏତେ ଚାଏ ଏଟାଃକତାଃଏତେହ୍ ମାଇନ୍ ନାମେ ନାଗେନ୍ତେ କାଲେ ସାନାଙ୍ଗ୍‌କାଦ୍ ତାଇକେନ୍‌ରେୟ, ୭ ଆଲେ ଯାଶୁ ଖ୍ରୀଷ୍ଟ୍‌ଆଃ ପ୍ରେରିଡ଼କ ହବାୟାନ୍ତେ ଆପେତାଃଏତେ ଏନା ହାଟି ଦାଡ଼ିକାଦ୍‌ତେ ତେୟାଃଲେ, ମେନ୍‌ଦ୍ ଏଙ୍ଗା ଆୟାଃ ହନ୍‌କକେ ସାକ୍‌ଲାଅ ଦାଡ଼ିଲେକା, ଆଲେ ଆପେତାଃରେ ତାଇକେନ୍ ଇମ୍‌ତା ଆପେକେୟ ଏନ୍‌ଲେକାଗି ଲେବେଃତେ ସାକ୍‌ଲାଅ କାଦ୍‌ପେ ତାଇକେନାଲେ । ୮ ଆଲେୟାଃ ଦୁଲାଡ଼୍ ଆପେ ନାଗେନ୍ତେ ତାଇନ୍ ହରାତେ ଆଲେ ଆପେକେ ପାର୍‌ମେଶ୍‌ୱାର୍‌ଆଃ ସୁକୁକାଜି ଏସ୍‌କାର୍ କାହା, ମେନ୍‌ଦ୍ ଆପେ ନାଗେନ୍ତେ ଆଲେୟାଃ ଜୀଦାନ୍‌କେୟ ଏମ୍ ନାଙ୍ଗ୍ ସେକାଡ଼ାକାନ୍ ତାଇକେନାଲେ, ଚିୟାଃତି ଆପେ ଆଲେୟାଃ ଦୁଲାଡ଼୍‌କପେ ହବାକାନ୍ ତାଇକେନା । ୯ ହେ ହାଗା ମିଗିକ, ଆପେଦ୍ ଆଲେୟାଃ ହାମ୍‌ଲା କାମି ଆଡ଼ଃ ଦୁକୁପେ ପାହାମେତାନା, ଆପେଏତେ ଜେତାଏରେ ବାହାରମ୍ ଆଲକା ଲାଦିୟଃକା ମେନ୍ତେ ଆଲେ ନିଦା ସିଙ୍ଗି କାମିକେଦ୍‌ତେ ଆପେ ଆଲାରେ ପାର୍‌ମେଶ୍‌ୱାର୍‌ଆଃ ସୁକୁକାଜିଲେ ଉଦୁବ୍‌କାଦ୍ ତାଇକେନା ।

୧୦ ଆପେ ବିଶ୍ୱାସୀ ତାନ୍‌ପେ, ଆପେ ଆଲାରେ ଆଲେ ଚିଲ୍‌କା ପାବିତାର୍, ଧାର୍‌ମାନ୍ ଆଡ଼ଃ କା ଚିଟାଃଅ ଲେକାଲେ

କାମି ତାଇକେନା, ଏନାରାଃ ଗାଞ୍ଜକ ଆପେଗି ତାନ୍ଦେ ଆତଃ ପାର୍ମେଶ୍ଵାର୍ ହଗି ତାନିଃ । ୧୧ ଆପେଦପେ ସାରିତାନା, ଆପୁ ଆୟାଃ ହନକଲଃ ରିକାଏ ଲେକା, ଆଲେ ଆପେ ସବେନ୍କଲଃ ଏନ୍ଲେକାଗିଲେ ରିକାକାଦ୍ ତାଇକେନା । ୧୨ ଆପେକେ କେଡାକାଦପେ ଏନ୍ ପାର୍ମେଶ୍ଵାର୍ଆଃ ରାଇନ୍ ଆତଃ ମାନାରାଙ୍ଗରେ ମେସାଃଅ ନାଗେନ୍ତେ ଆପେ ଆଇଃକକେ ସୁକୁଆଇ ଲେକାନ୍ ଜୀଦାନ୍ ବିତାଏପେ, ମେନ୍ତେ ଆଲେ ଆପେକେ ବିନ୍ତିତାନ୍ଲଃ ଜୀଉରାସ୍କା ଆତଃ ଜୀଉରେ କେଟେଦ୍ଲେ ଏମାକାଦପେ ତାଇକେନା ।

୧୩ ଆତଃ ଆଲେ ଆପେତାଃରେ ପାର୍ମେଶ୍ଵାର୍ଆଃ ବାଚାନ୍ ହାଟିଙ୍ଗକେଦ୍ ଇମତା, ଆପେ ଏନାକେ ହଡକଆଃ କାଜିତାନାଃ ମେନ୍ତେ କା କାଜିକେଦ୍ତେ, ପାର୍ମେଶ୍ଵାର୍ଆଃ ବାଚାନ୍ ଲେକା ଆୟୁମ୍ତାନ୍ଲଃ ତେଲିକାଦ୍ ତାଇକେନାପେ । ଆତଃ ଏନା ସାର୍ତ୍ତିଗି ପାର୍ମେଶ୍ଵାର୍ଆଃ ବାଚାନ୍ ତାନାଃ, ଆତଃ ଆପେ ଲେକାନ୍ ବିଶ୍ଵାସୀକଆଃ ମନ୍ସୁରୁଦ୍ରେ କାମିୟଃତାନା । ଏନାମେନ୍ତେ ଆଲେ ପାର୍ମେଶ୍ଵାର୍କେ ଜାନାଅଗିଲେ ଜହାରିତାନା । ୧୪ ☆ଚିୟାଠି, ହେ ହାଗା ମିଶିକ, ଯିହୁଦା ଦିଶୁମ୍ରେ ତାଇନ୍ତାନ୍ ପାର୍ମେଶ୍ଵାର୍ଆଃ କାଲିସିୟାକରେ ଆତଃ ଏନ୍ତାଃରେନ୍ ଖ୍ରୀଷ୍ଟ ବିଶ୍ଵାସୀକରେ ହବାଲେନ୍ ଲେକାଗି ଆପେରେହ୍ ହବାଅଃତାନା । ଇନ୍କୁ ଯିହୁଦୀକତାଃଏତେ ସାସାତି ନାମ୍କେଦ୍ ଲେକାଗି ଆପେୟ ଆପେୟାଃ ହଡକତାଃଏତେ ସାସାତିପେ ନାମେତାନା । ୧୫ ☆ଏନ୍ ଯିହୁଦୀକଦ ପ୍ରାଭୁ ଯୀଶୁକେ ଆତଃ ନାବୀକକେୟ ଗଏଃକେଦ୍କଆକ ଆତଃ ଆରୁକେ ସାସାତିକେଦ୍ରୁଆକ । ଇନ୍କୁ ପାର୍ମେଶ୍ଵାର୍ଆଃ କା ସୁକୁଆନ୍କ ତାନ୍କ ଆତଃ ସବେନ୍ ହଡକଆଃ ବାଇରିକ ତାନ୍କ । ୧୬ ସାଅଁସାର୍ ହଡକଆଃ ଜୀଉବାଞ୍ଚାଅ ନାମେ ନାଗେନ୍ତେ ଅକନ୍ ସୁକୁକାଜି ଉଦୁବଃତାନା, ଏନାକେୟ ଆଲେକେ ଉଦୁଦ୍ ନାଗେନ୍ତେ କାଜିକଟଙ୍ଗ ନାଙ୍ଗ୍ ସାନାଙ୍ଗ୍ତାନାକ । ଏନ୍ଲେକା ଇନ୍କୁ ସବେନ୍ ଇମ୍ତା ଆକଆଃ ଆକଆଃ ପାପ୍ରେ ପେରେଜାକାନାକ । ଆତଃ ଚୁଣ୍ଟୁରେ ନାହାଁଃ ପାର୍ମେଶ୍ଵାର୍ଆଃ ଖ୍ଵ ଇନ୍କୁଆଃ ବିରୁଧ୍ରେ ସେଟେରାକାନା ।

ପାଉଲୁସ୍ ଆତଃମିସା ଇନ୍କୁତାଃତେ ସେନ୍ ନାଗେନ୍ତେ

☆ ୨:୧୪ ୨:୧୪ ପ୍ରେରିଡ୍ ୧୭:୫. ୧୪:୨,୫,୧୯; ୧୭:୫,୧୩; ୧୮:୧୨.

☆ ୨:୧୫ ୨:୧୫ ପ୍ରେରିଡ୍ ୯:୨୩,୨୯; ୧୩:୪୫,୫୦;

ସାନାଙ୍କକେଦା

୧୭ ହେ ହାଗା ମିଶିକ, ଆଲେ ଆପେତାଃଏତେ ମନ୍‌ରେଦ କା ମେନ୍‌ଦ ହଡ଼ମରେ ହୁଡ଼ିଙ୍ଗ ଦିପିଲି ବିନ୍‌ଗାଅକାନ୍ ନାଗେନ୍ତେ ଆପେକେ ଆଡ଼ଃମିସା ନେଲ୍ ନାଙ୍ଗ ପୁରାଃଲେ ସାନାଙ୍ଗ ତାଇକେନା । ୧୮ ଏନା ନାଗେନ୍ତେ ଆଲେ ଆପେତାଃତେ ସେନ୍ ନାଗେନ୍ତେଲେ ଉହାଟ୍‌କାଦ୍ ତାଇକେନା, ଆଇଙ୍ଗ ପାଉଲୁସ୍ ମିସା, ବାଟ୍‌ସାଏତେ ଆଦକା ଆପେତାଃତେ ସେନ୍ ନାଙ୍ଗ ମନେକାଦ୍ ତାଇକେନାଇଙ୍ଗ, ମେନ୍‌ଦ ସାଏତାନ୍ ଆଲେକେ ଛେକାଦ୍ କେଦ୍‌ଲେୟା । ୧୯ ଚିୟାଃତି ଆରୁଆଃ ପ୍ରାଭୁ ଯୀଶୁଆଃ ହିନିଜୁଃ ଦିପିଲିରେ ଆୟାଃ ସାମ୍‌ନାଙ୍ଗରେ ଏଟାଃକ ଲେକା ଆପେୟ ଆଲେୟାଃ ଆସ୍ରା, ରାସକା ଚାଏ ମାନାରାଙ୍ଗରାଃ ମୁକୁଟ୍ ଚିନାଃତାନାଃ ? ଚିୟାଃ ଆପେଗି ନାହାଁଲାପେଚି ? ୨୦ ଆପେଗିଦ ଆଲେୟାଃ ମାନାରାଙ୍ଗ ଆଡ଼ଃ ରାସକା ତାନ୍‌ପେ ।

୩

୧ ☆ଆଲେ ସାହାତିଙ୍ଗ କାଲେ ଦାଡ଼ିୟାନା, ଏନା ନାଗେନ୍ତେ ଏଥେନ୍‌ସରେ ଏସକାଟ୍ ତାଇନ୍ ନାଗେନ୍ତେଲେ ଉହାଟ୍‌କେଦା । ୨ ଆପେକେ ପେଡ଼େଃପେ ନାଗେନ୍ତେ ଆଡ଼ଃ ବିଶ୍ୱାସରେ ତାଇନ୍ ନାଙ୍ଗ ଜୀଉରେ ରାସକା ଏମାପେ ନାଗେନ୍ତେ ଆପେତାଃତେ ଆଲେୟାଃ ହାଗା ତୀମଥୁକେଲେ କୁଲିୟା । ଇନିଃ ଖ୍ରୀଷ୍ଟୁଆଃ ସୁକୁକାଜି ଉଦୁବ୍ ନାଙ୍ଗ ପାର୍‌ମେଶ୍ୱାର୍‌ଆଃ ସେଝା କାମିରେ ଆଲେଲଃ ମିସାତେ କାମିନିଃ ତାନିଃ । ୩ ଜେ'ଲେକାଚି ନେ ସବେନ୍ ସାସାତି ହରାତେ ଜେତାଏ ବିଶ୍ୱାସଏତେ ଆଲକାଏ ରୁହାଡ଼କା । ଆରୁ ନେ'ଲେକାଗି ସାସାତି ନାମେନାଙ୍ଗ୍‌ରୁ ଦହାକାନା, ଏନା ପାର୍‌ମେଶ୍ୱାର୍‌ଆଃ ସାନାଙ୍ଗତାନାଃ, ଏନାଦପେ ସାରିତାନା । ୪ ଚିୟାଃତି ଆରୁଆଃ ସାସାତି ହବାଅଆଃ ମେନ୍ତେ ଆଲେ ଆପେଲଃ ତାଇକେନ୍ ଇମ୍‌ତାରେଗି ଆପେକେ ସିଦାରେ କାଜିକାଦ୍‌ପେ ତାଇକେନାଲେ । ଏନା ଏନ୍‌ଲେକାଗି ହବାଅଃତାନା, ଏନାପେ ସାରିତାନା । ୫ ହବାସାକାଅଆଃ ସାଏତାନ୍ ଆପେକେ ବିଡ଼ାଅକାଦ୍‌ପେୟା ଆଡ଼ଃ ଆଲେୟାଃ କାମିକ ସାମାଏଶ୍ୱାଗଃଆ, ନେଆଁ ଉଡ଼ୁକେଦ୍‌ତେ ଆଇଙ୍ଗ କାଇଙ୍ଗ ସାହାତିଙ୍ଗ

☆ ୩:୧ ୩:୧ ପ୍ରେରିଡ଼ ୧୭:୧୫.

ଦାଢ଼ିୟାନା, ଏନା ନାଗେନ୍ତେ ଆଇଙ୍ଗ୍ ଆପେୟାଃ ବିଶ୍ୱାସ୍ ବିଷ୍ଟାଏରେ ସାରିନାଙ୍ଗ୍ ତାମଥୁକେ ଆପେତାଃତେଇଙ୍ଗ୍ କୁଲ୍‌କିୟା ।

୬ ☆ମେନ୍‌ଦ ନାହାଁଃ ତାମଥୁ ଆପେତାଃଏତେ ଆଲେତାଃ ହିଜୁଃକାନାଏ ଆତଃ ଆପେୟାଃ ବିଶ୍ୱାସ୍ ଆତଃ ଦୁଲ୍‌ାଡ଼୍ ବିଷ୍ଟାଏରେ ରାସ୍‌କାରାଃ ସୁକୁକାଜି ଆଉକାଦା । ଆମ୍ ଆଲେୟାଃ ନାଙ୍ଗ୍ ବୁଗିନ୍‌ତେୟାଃ ଉଡ଼ୁ ଆତଃ ଆଲେ ଆମ୍‌କେ ନେନେଲ୍ ସାନାଙ୍ଗ୍‌ତାନଲେକା ଆମ୍‌ହ ଆଲେକେ ନେନେଲ୍ ସାନାଙ୍ଗ୍‌ତାନାମ୍ ମେନ୍ତେ ଇନିଃ କାଜିକାଦ୍‌ଲେୟାଏ । ୭ ଏନାମେନ୍ତେ ହେ ହାଗା ମିଗିକ, ଆପେୟାଃ ବିଶ୍ୱାସ୍ ନାଙ୍ଗ୍ ଆଲେୟାଃ ସବେନ୍ ଦୁକୁ ଆତଃ ହାସୁ ଇମ୍‌ତା ଆଲେ ଆପେୟାଃ ହରାତେ ଜୀଉରାଡ଼େଃଲେ ନାମାକାଦା । ୮ ନାହାଁଃ ଆପେ ପ୍ରାଭୁରେ ତିଙ୍ଗ୍‌କେଟେଦ୍ କାନ୍‌ରେଦ, ଆବୁ ସାର୍‌ତିଗି ଜୀହୁଦଃ ତାନାବୁ । ୯ ନାହାଁଃଦ ଆଲେ ଆପେୟାଃ ହରାତେ ପୁରାଃ ରାସ୍‌କାଲେ ନାମାକାଦା, ଏନାମେନ୍ତେ, ଏନାରେୟାଃ ବାଦ୍‌ଲରେ ନାହାଁଃ ପାର୍‌ମେଶ୍ୱାର୍‌କେ ଧାନ୍ୟାବାଦ୍‌ଲେ ଏମାଇତାନା । ୧୦ ଆପେକେ ଆତଃମିସା ନେନେଲ୍ ନାଙ୍ଗ୍ ଆତଃ ଆପେୟାଃ ବିଶ୍ୱାସ୍‌ରେ ଜାଞ୍ଜିକାନ୍‌ତେୟାଃ ପୁରାଅଃ ନାଗେନ୍ତେ ନିଦାସିଙ୍ଗି ବିନ୍ତିତାନାଲେ ।

୧୧ ଆପେତାଃତେ ହିଜୁଃ ନାଙ୍ଗ୍ ଆବୁଆଃ ଆପୁ ପାର୍‌ମେଶ୍ୱାର୍ ଆଇଃକ୍‌ଗି ଆତଃ ଆବୁଆଃ ପ୍ରାଭୁ ଯୀଶୁ ଆବୁଆଃ ହରାଏ ବାଇୟେକା । ୧୨ ଆପେୟାଃ ନାଙ୍ଗ୍ ଆଲେୟାଃ ଦୁଲ୍‌ାଡ଼୍ ଜେ'ଲେକା ପୁରାଃଗିଆ, ଏନ୍‌ଲେକାଗି ମିହୁଡ୍ ଆତଃମିହୁଡ୍ ନାଙ୍ଗ୍ ଆତଃ ସବେନ୍‌କ ନାଙ୍ଗ୍ ପ୍ରାଭୁ ଆପେୟାଃ ଦୁଲ୍‌ାଡ଼୍‌କେ ଆତଃଗି ପୁରାଃତେ ହାରାଇଦିକା । ୧୩ ଏନ୍‌ଲେକାଗି ଇନିଃ ଆପେୟାଃ ମନ୍‌କେ ପେଡ଼େଦ୍‌ପେୟା, ଏନାତେ ଆବୁଆଃ ପ୍ରାଭୁ ଯୀଶୁ ଆୟାଃ ପାବିତାର୍ ହଡ଼କଲଃ ହିଜୁଃ ଇମ୍‌ତା ଆବୁଆଃ ଆପୁ ପାର୍‌ମେଶ୍ୱାର୍‌ଆଃ ଆୟାର୍‌ରେ ଆପେ ପକ୍‌ତାକାନ୍ ଆତଃ ପାବିତାର୍‌ରେ ବେଗାର୍ ଚିଟାକାନ୍ ଲେକାପେ ହବିଅଃଆ ।

୪

ପାର୍‌ମେଶ୍ୱାର୍‌କେ ସୁକୁଆଇଲେକାନ୍ ଜୀଦାନ୍

☆ ୩:୭ ୩:୭ ପ୍ରେରିଡ଼ ୧୮:୫.

୧୧ ଟୁଣ୍ଡୁରେ, ହେ ହାଗା ମିଶିକ, ପାର୍ମେଶ୍ଵାରକେ ସୁକୁଆଇଲେକା ଚିଲ୍ଲକା ଜୀଦାନ୍ ବିତାଅ ଲାଗାତିଙ୍ଗିୟାଃ, ଏନା ଆଲେତାଃଏତେ ଇଡୁକାନାପେ, ଏନ୍‌ଲେକାଗି ଆପେୟାଃ ଜୀଦାନ୍ ବିତାଅତାନାପେ । ମେନ୍‌ଦ ଏନାଏତେ ଆଦ୍‌କା ରିକାନାଙ୍ଗ୍ ଆଲେ ଆପେକେ ପ୍ରାଭୁ ଯୀଶୁଆଃ ନୁଡୁମ୍‌ତେ ପୁରାଃଗି ହାରାଇଦିୟାଃପେ ମେନ୍ତେ ବିନ୍ତି ଆତଃ ଉସକୁରପେ ତାନାଲେ । ୯ ଚିୟାଃଗି ଆଲେ ପ୍ରାଭୁ ଯୀଶୁଆଃ ଆକ୍‌ତେୟାର୍‌ତେ ଆପେକେ ଏମାକାଦ୍ ଆନାଟୁକେ, ଆପେଦ ରୁଗିଲେକାପେ ସାରିଆକାଦା । ୧୦ ଆପେ ପାବିତାର୍ ହବାଅଃପେ ଆତଃ ଆପାଙ୍ଗିର୍ କାମିଏତେ ସାଙ୍ଗିନ୍‌ରେ ତାଇନ୍‌ପେ, ନେଆଁ ପାର୍ମେଶ୍ଵାର୍‌ଆଃ ସାନାଙ୍ଗ୍‌ତାନାଃ । ୧୧ ଆପେ ସବେନ୍‌କ ଆପେୟାଃ କୁଡିକଲଃ ପାବିତାର୍‌ତେ ଆତଃ ମାଇନ୍ ନାମେଲେକା ଚିଲ୍ଲକା ତାଇନାଃପେ, ଏନା ଆପେକେଗି ସାରି ଲାଗାତିଙ୍ଗିୟାଃ, ୧୨ ପାର୍ମେଶ୍ଵାରକେ କା ସାରିତାନ୍ ସାଆଁସାର୍ ହଡକଆଃ ଲେକା ହଡମ୍‌ରେୟାଃ ଏଡକାନ୍ ସାନାଙ୍ଗ୍‌ଲେକା ଆଲ୍‌ପେ ହବାଅଃଆ । ୧୩ ଆତଃ ଜେତାଏ ହଡ ଖ୍ରୀଷ୍ଟିୟାନ୍ ହାଗାକେ ଆଲକାଏ ବେଦାଇକା ଆତଃ ଏଡକାନ୍ ଆଲକାଏ ରିକାଇକା । ଏନ୍‌ଲେକାଗି କାମିତାନ୍‌କକେ ପ୍ରାଭୁ ସାଜାଇ ଏମାକଆଏ ମେନ୍ତେ ଆଲେ ଆପେକେ ସିଦାରେଗି କାଜିକେଦ୍‌ତେ ପୁରାଃ କେଟେଦ୍‌ତେ ତେତାଅକାଦ୍‌ପେୟାଲେ । ୧୪ ପାର୍ମେଶ୍ଵାର୍ ଆବୁକେ ସଡରାଲେକା ଜୀଦାନ୍ ବିତାଅ ନାଗେନ୍ତେ କାହା ମେନ୍‌ଦ ପାବିତାର୍ ଜୀଦାନ୍ ବିତାଅ ନାଗେନ୍ତେ କେଡାକାଦ୍‌ବୁଆ । ୧୫ ଏନା ନାଗେନ୍ତେ ଜେତାଏ ନେ ଇନିଡୁକେ କାଏ ତେଲ୍ୟାଏନିଃ, ହଡକେ କାଏ ହିଲାଙ୍ଗ୍‌ଆଃ, ମେନ୍‌ଦ ପାବିତାର୍ ଆମ୍‌କେ ଏମିତାନ୍ ପାର୍ମେଶ୍ଵାରକେ ହିଲାଙ୍ଗ୍‌ଇତାନା ।

୧୬ ଖ୍ରୀଷ୍ଟିୟାନ୍ ବିଶ୍ଵାସୀ ଦୁଲାଡ୍ ବିଷାଏରେ ଆପେତାଃତେ ଆତଃଗି ଅଲ୍ ନାଙ୍ଗ୍ କା ଲାଗାତିଙ୍ଗିୟାଃ, ଚିୟାଃଗି ଆପେ ସବେନ୍‌କ ଦୁପୁଲାଡ୍‌ରେ ତାଇନ୍ ନାଗେନ୍ତେ ପାର୍ମେଶ୍ଵାର୍‌ତାଃଏତେ ଆପେଗିପେ ଇଡୁକାନା । ୧୭ ଆତଃ ଆପେୟାଃ ଚାଇଲ୍ ଚାଲ୍ୟାନ୍ ମାକିଦନିଆରେନ୍ ସବେନ୍ ଖ୍ରୀଷ୍ଟିୟାନ୍ ବିଶ୍ଵାସୀକଲଃ ଏନ୍‌ଲେକାଗି ହବାକାନା । ଏନାତେ ହେ ହାଗା ମିଶିକ, ନେଲେକା ଆତଃଗି ପୁରାଃତେ ରିକାଏପେ ମେନ୍ତେଲେ ବିନ୍ତିପେ ତାନା । ୧୮ ଆପେକେ ପାହିଲାରେ ଆଡୁକାଦ୍‌ପେ ଲେକା, ସୁକୁଜୀଉତେ ଜୀଦାନ୍ ବିତାଅତାନ୍‌ଲଃ ଆପ୍‌ନାଃ ଆପ୍‌ନାଃ

କାମି କାମିପେ ଆଡ଼ଃ ଆପେୟାଃ ଜୀହୁଦଃ ନାଙ୍ଗ୍ ଜଗାଏପେ ।
 ୧୨ ଏନ୍‌ଲେକା କାମି ହରାତେ ଆପେ କା ବିଶ୍ୱାସ୍‌ତାନ୍ ହଡ଼କତାଃଏତେ
 ହରି ମାଇନ୍‌ପେ ନାମେୟା ଆଡ଼ଃ ଆପେୟାଃ ଜେଡ଼ନାଃରେ କା
 ଜାଞ୍ଜିଅଃଆ ।

ପ୍ରାଭୁଆଃ ହିନିଜୁଃ

୧୩ ହେ ହାଗା ମିଶିକ, ଗଜାକାନ୍ ହଡ଼କଆଃ ସାର୍ତି ବିଷାଏରେ
 ଆପେ ସାରିପେ ଆଡ଼ଃ ଆସ୍ତା ବାନଃତାନ୍ ଏଟାଃ ହଡ଼କଲେକା ଆପେ
 ଆଲ୍‌ପେ ଦୁକୁନାଃ, ଏନା ଆଲେୟାଃ ସାନାଙ୍ଗ୍‌ତାନାଃ । ୧୪ ଚିୟାଃଚି
 ଆବୁ, ଯୀଶୁ ଗଏଃୟାନାଏ ଆଡ଼ଃ ଜୀଉବିରିଦ୍‌ୟାନାଏ ମେନ୍ତେବୁ
 ବିଶ୍ୱାସ୍‌ତାନା । ଏନ୍‌ଲେକାଗି ଯୀଶୁରେ ବିଶ୍ୱାସ୍‌କେଦ୍‌ତେ ଗଜାକାନ୍‌କ,
 ଯୀଶୁ ଆଡ଼ଃମିସାଏ ହିଜୁଃ ଇମ୍‌ତା ପାରମେଶ୍ୱାର୍ ଇନ୍‌କୁକେ ଯୀଶୁଲଃ
 ଆଡ଼ତରସାକଆ, ଏନାହରି ଆବୁକେ ବିଶ୍ୱାସ୍ ଲାଗାତିଙ୍ଗ୍‌ୟାଃ ।

୧୫ ✨ଆଲେ ନାହାଃ ଆପେକେ ଇଡୁପେତାନ୍‌ତେୟାଃ ପ୍ରାଭୁଆଃ
 ଇନିଡୁ ତାନାଃ । ଆବୁ ସବେନ୍‌କଏତେ ଅକନ୍‌କ ପ୍ରାଭୁଆଃ
 ହିନିଜୁଃ ଜାକେଦ୍ ଜୀହିଦ୍‌ଗିକ ତାଇନା, ଇନ୍‌କୁ ସିଦାରେ ଗଜାକାନ୍
 ହଡ଼କତାଃଏତେ ଜେତାଲେକାତେ କାକ ଆୟାରଃଆ । ୧୬ ଚିୟାଃଚି
 ପ୍ରାଭୁଦ୍ ଆଇଃକ୍‌ଗି ଆବୁକେଦ୍‌ତେ ମାରାଙ୍ଗ୍ ଦୁଡ଼କଆଃ ଲାବ୍‌ଜା
 ଆଡ଼ଃ ପାରମେଶ୍ୱାର୍‌ଆଃ ବିଙ୍ଗ୍‌ଲ୍ ବାଜା ସାଡ଼ିତାନ୍‌ଲଃ ସିର୍ନାଏତେ
 ଆଡ଼ଗୁନାଃ ଆଡ଼ଃ ଖ୍ରୀଷ୍ଟାଃରେ ବିଶ୍ୱାସ୍‌କେଦ୍‌ତେ ଗଜାକାନ୍‌କ
 ସିଦାକ ବିରିଦାଃ । ୧୭ ଏନ୍ତେ ଆବୁ ସବେନ୍‌କଏତେ ଅକନ୍‌କ
 ଜୀହିଦ୍‌ଗିରୁ ତାଇନା, ପ୍ରାଭୁଲଃ ନେପେଲ୍ ନାଗେନ୍ତେ ଆବୁକେ
 ଇଦିକେଦ୍‌ତେ ଇନ୍‌କୁଲଃ ମିସାତେ ରିମିଲ୍ ହୟରେ ହୁଣ୍ଡିବୁଆ ।
 ଆଡ଼ଃ ଆବୁ ପ୍ରାଭୁଲଃ ସବେନ୍ ହୁଲାଇବୁ ତାଇନା । ୧୮ ଏନାମେନ୍ତେ
 ଆପେ ନେ ସବେନ୍ କାଜିତେଗି ମିହୁଡ୍ ଆଡ଼ଃମିହୁଡ୍‌କେ ଜୀଉରାଡ଼େଃ
 ଏମଃପେ ।



ପ୍ରାଭୁଆଃ ହିଜୁଃ ଦିପିଲି ନାଗେନ୍ତେ ସେକାଡ଼ାକାନ୍ ତାଇନ୍‌ପେ

✨ ୪:୧୫ ୪:୧୫ ୧ କରିଛିୟ ୧୫:୫୧,୫୨.

୧ ମେନ୍ଦ ହେ ହାଗା ମିଶିକ, ନେ ସବେନ୍ ବିଷାଏ ଚିତ୍ତଲ୍ଲା ହବାଅଥା ଆତଃ ଅକ ନେତାରେ ହବାଅଥା, ଏନ୍ ବିଷାଏରେ ଆଲେକେ ଆପେତାଃତେ ଜେଡନାଃ ଅଲ୍ କା ଲାଗାଡିଙ୍ଗ୍‌ୟାଃ । ୨ ☆ ଚିୟାଃଚି ନୁବାଃରେ କୁମ୍‌ଡୁ ହିନ୍‌ଡୁଃ ଲେକା ପ୍ରାଭୁ ହିନ୍‌ଡୁଃଆଏ, ନେଆଁ ଆପେ ବୁଗିଲେକାପେ ସାରିତାନା । ୩ ଚିମ୍‌ତା ହଡକ ଜୀଉରେ “ସୁକୁ ଆତଃ ଜେତାନ୍ ବର ବାନଆଃ” ମେନେତାନ୍ ଇମ୍‌ତା, ବାଜ୍ ଆକାନ୍ କୁଡିତାଃରେ ସେଟେରାକାନ୍ ଦୁକୁ ଲେକା ଇମ୍‌ତାଗି ଇନ୍‌କୁତାଃରେ ଜିୟନଃ ସେଟେରାଃ ଆତଃ ଇନ୍‌କୁ ଜେତାଲେକାତେ କାକ ବାଞ୍ଚାଅଥା । ୪ ମେନ୍ଦ ହେ ହାଗା ମିଶିକ, ଆପେ ନୁବାଃରେ ବାଙ୍ଗ୍‌ପେୟା, ଏନାତେ ଏନ୍ ହୁଲ୍ଲାଙ୍ଗ୍ ବେଗାର୍ ସାରିତାନ୍‌ଲଃ ଆପେତାଃତେ କୁମ୍‌ଡୁ ହିନ୍‌ଡୁଃତାନ୍ ଲେକା କା ସେଟେରା । ୫ ଆପେ ସବେନ୍‌କ ମାସ୍‌ଲ୍‌ରେନ୍ ଆତଃ ସିଙ୍ଗିରେନ୍ ହଡକ ତାନ୍‌ପେ । ଆବୁ ନିଦା ଚାଏ ନୁବାଃରେନ୍ ହଡକ ନାହାଁଲାବୁ । ୬ ଏନାମେନ୍ତେ ଆବୁ ଏଟାଃକ ଲେକା ଆଲକାବୁ ଦୁଡ଼ମ୍‌କା, ମେନ୍ଦ ଏୟନାକାନ୍ ଆତଃ ଚିଗାଁଲାକାନ୍‌ବୁ ତାଇନ୍‌କା । ୭ ଚିୟାଃଚି ଦୁଡ଼ମ୍‌ତାନ୍‌କ ନିଦାରେକ ଦୁଡ଼ମ୍‌ଠାଃ, ଆତଃ ଇଲିଆର୍‌ଖିରେ ବୁଲଃତାନ୍‌କ ନିଦାରେକ ବୁଲଃଆଃ । ୮ ☆ ମେନ୍ଦ ଆବୁ ସିଙ୍ଗିରେନ୍ ହଡକ ହବାୟାନ୍ତେ, ମେଡେଦରାଃ ତୁସିଙ୍ଗ୍‌ତେୟାଃ କୁଡାମ୍‌ରେ ତୁସିଙ୍ଗ୍‌କାନ୍ ଲେକା, ବିଶ୍ୱାସ୍ ଆତଃ ଦୁଲ୍ଲାଡ଼ରେବୁ ତୁସିଙ୍ଗ୍‌କାନଃଆ । ଆତଃ ବହଃରେ ଚୁପୁରି ତୁସିଙ୍ଗ୍‌କାନ୍ ଲେକା ଜୀଉବାଞ୍ଚାଅରେୟାଃ ଆସ୍ରାବୁ ତୁସିଙ୍ଗ୍‌କାନଃଆ । ଏନ୍ତେ ଆବୁ ଆବର୍‌ରେବୁ ତାଇନ୍‌କା । ୯ ଚିୟାଃଚି ପାର୍‌ମେଶ୍ୱାର୍ ଆବୁକେ ଖ୍ୱସ୍ ନାଗେନ୍ତେଦ କା ମେନ୍ଦ ଆବୁଆଃ ପ୍ରାଭୁ ଯାଶୁ ଖ୍ରୀଷ୍ଟ୍‌ଆଃ ହରାତେ ଜୀଉବାଞ୍ଚାଅ ନାମେ ନାଗେନ୍ତେ ସାଲାକାଦ୍‌ବୁଆ । ୧୦ ଆବୁ ନେ ଜୀଦାନ୍‌ରେ ଜୀହିଦ୍‌କାନ୍ ଚାଏ ଗଜାକାନ୍ ତାଇନ୍‌ରେୟ ଇନିଃଲଃ ମିଦ୍‌ରେବୁ ଜୀହିଦଃକା ମେନ୍ତେ ଇନିଃ ଆବୁନାଙ୍ଗ୍ ଗଏଃୟାନାଏ । ୧୧ ଏନା ନାଗେନ୍ତେ ଆପେ ନାହାଁଃ ରିକାତାନ୍ ଲେକା ମିହୁଡ୍‌ ଆତଃମିହୁଡ୍‌କେ ଜୀଉରାଡେଃ ଆତଃ ଦେଙ୍ଗାଲପେ ।

ଚୁଣ୍ଟୁଆନାରୁ ଆତଃ ଜହାର୍

☆ ୫:୨ ୫:୨ ମାଥୁର ୨୪:୪୩; ଲୁକ ୧୨:୩୯; ୨ ପାଡ଼ରାସ୍ ୩:୧୦. ☆ ୫:୮ ୫:୮ ଏପିସିୟ ୬:୧୩-୧୭.

୧୨ ମେନ୍ଦ ହେ ହାଗା ମିଶିକ, ଆଲେ ଆପେକେ ବିକ୍ରିପେ ତାନାଲେ, ଅକନ୍ଦ ଆପେ ଆଲାରେ କାମିତାନାକ ଆତଃ ପ୍ରାଭୁଆଃ ସେଞ୍ଜାକାମିରେ ଆପେୟାଃ ଆଗୁଆଇ ଲେକା ସାଲାନେଦ୍‌ଡେତେ ଚେତାଅପେତାନାକ, ଇନ୍‌କୁକେ ମାଇନ୍‌କପେ । ୧୩ ଆତଃ ଇନ୍‌କୁଆଃ କାମି ନାଗେନ୍ତେ ଇନ୍‌କୁକେ ପୁରାଃ ଦୁଲ୍ଲାଡ୍‌ଡେତେ ମାଇନ୍‌କପେ । ଆତଃ ଆପେ ସବେନ୍‌କଲଃ ସୁକୁରେ ତାଇନ୍‌ପେ ।

୧୪ ମେନ୍ଦ ହେ ହାଗା ମିଶିକ, ଆପେକେ ବିକ୍ରିପେତାନାଲେ, ଆଲ୍‌ସି ହଡକକେ ଚେତାଅକପେ, ବରତାନ ହଡକକେ ଜୀଉରେ କେଟେଦ୍ ଏମାକପେ, ନାରାଦୁରାକକେ ଦେଙ୍ଗାକପେ, ସବେନ୍‌କଲଃ ସାହାଡିଙ୍ଗ୍ ଜୀଦାନ ବିତାଏପେ । ୧୫ ଜେତାଏ ଏଡକାନାଃରାଃ ବାଦଲ୍‌ରେ ଏଡକାନାଃ ଆଲକାଏ ରିକାଏକା, ମେନ୍ଦ ଆପେ ସବେନ୍ ଇମ୍‌ତା ମିହୁଡ୍ ଆତଃମିହୁଡ୍‌ଆଃ ଆତଃ ସବେନ୍‌କଆଃ ବୁଗିନାଃ ରିକା ନାଙ୍ଗ୍ ସାନାଙ୍ଗ୍‌ପେ ।

୧୬ ଜାନାଅଗି ରାସକାଅଃପେ, ୧୭ ସବେନ୍ ଇମ୍‌ତା ବିକ୍ରିପେ । ୧୮ ସବେନ୍ ଲେକାନ କାଜିକରେ ଧାନ୍ୟାବାଦ୍ ଏମେପେ । ଆପେ ଯୀଶୁ ଖ୍ରୀଷ୍ଟୁଆଃ ମେନେସାରେ ଜୀଦାନ ବିତାଅକାଦ୍ ହରାତେ, ଆପେ ନାଙ୍ଗ୍ ନେଆଁ ପାରମେଶ୍ୱାର୍ ଆଃ ମନେତାନା ।

୧୯ ପାବିତାର୍ ଆମ୍‌କେ ଦୁକୁ ଆଲ୍‌ପେ ଏମାଇୟା । ୨୦ ପ୍ରାଭୁଆଃ କାଜିଏମ୍‌କେ ଆଲ୍‌ପେ ହିଲାଙ୍ଗ୍‌ୟେ । ୨୧ ସବେନାଃ ବିଡାଅକେଦ୍‌ଡେତେ, ବୁଗିନ୍‌ଡେୟାଃ ସାବେପେ, ୨୨ ଆତଃ ସବେନ୍ ଲେକାନ ଏଡକାନ୍‌ଡେୟାଃ ସାଙ୍ଗିନେପେ ।

୨୩ ଅକ ପାରମେଶ୍ୱାର୍ ଆବୁକେ ଜୀଉସୁକୁ ଏମାଃଏ, ଇନିଃଗି ଆପେକେ ସବେନ୍ ବିଷାଏରେ ପୁରାଃତେ ପାବିତାର୍‌ପେକା, ଆତଃ ଆବୁଆଃ ପ୍ରାଭୁ ଯୀଶୁ ଖ୍ରୀଷ୍ଟୁଆଃ ହିନିକୁଃ ଇମ୍‌ତା ଆପେୟାଃ ସବେନ୍ ଆମ୍‌, ଜୀଉ, ଆତଃ ହଡ୍‌ମକେ କା ଚିଟାଃଅ ଲେକା ଦହେପେ । ୨୪ ଆପେକେ ହାକାଅନିଃ ସବେନାଃ ରିକାଏ ଗିୟାଏ, ଚିୟାଃଚି ଇନିଃ ପାଡିୟାରଃଲେକାନିଃ ତାନିଃ ।

୨୫ ହେ ହାଗା ମିଶିକ, ଆଲେ ନାଗେନ୍ତେ ସବେନ୍‌କ ବିକ୍ରିପେ ।

୨୬ ସବେନ୍ ହାଗା ମିଶିକକେ ଖ୍ରୀଷ୍ଟୁ ଦୁଲ୍ଲାଡ୍‌ଡେତେ ଜହାର୍‌କପେ ।

୨୭ ସବେନ୍ ହାଗା ମିଶିକଆଃ ଆୟାର୍‌ରେ ନେ ଚିଟାଉ ପାଭାଅଃକା ମେନ୍ତେ ଆଇଙ୍ଗ୍ ପ୍ରାଭୁଆଃ ନୁଡୁମ୍‌ଡେତେ ଆପେକେଇଙ୍ଗ୍ ବିକ୍ରିପେତାନା ।

୨୮ ଆରୁଆଃ ପ୍ରାଭୁ ଯୀଶୁ ଖ୍ରୀଷ୍ଟଆଃ ସାୟାଦ୍ ଆପେଲଃ ହବାଅଃକା
।

ପାରମେଶ୍ଵରୀୟାଃ ଜୀନିଦ୍ ବାଚାନ୍
The New Testament in the Munda language of India:
ପାରମେଶ୍ଵରୀୟାଃ ଜୀନିଦ୍ ବାଚାନ୍

copyright © 2020 The Word for the World International

Language: ମୁଞ୍ଜା (Muṅḍa) (Munda)

Contributor: The Word for the World International

ପାରମେଶ୍ଵରୀୟାଃ ଜୀନିଦ୍ ବାଚାନ୍
ନାଞ୍ଜା ନିୟମ୍ , 2020

The New Testament in Munda Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 22 Feb 2024 from source files dated 14 Apr 2023

903abb6b-97c3-582d-9df8-a6a8f2fce6d6